

Nunatta Karsiata 2011-mut naatsorsuutaasa akuersissutigineqarnerat**Saqqummiussissut**

(Aningaasaqarnermut Naalackersuisoq)

Siullermeerneqarnera

Nunatta Karsia 2011-mi ulluinnarni ingerlatsinermi 49 mio. koruuninik sinneqartooruteqarpoq. Taakku angusaapput aningaasaqarnermik akisussaassusilimmik politikeqarnermut takussutissaasut. Tassami ingerlatsinermi sanaartornermilu oqimaaqatigiittoqarnissaa pisariaqarmat, inuiaqatigiit siunissami atugarissaartuunissaat isumannaarneqassappat.

Naalackersuisut kissaatigilluinnarpaat meeqqatta inuiaqatigiit inuuffigilissagaat atugarissaarnissamut akissaqartitsisut. Inuiaqatigiittaaq piujuartitsinissamik tunngaveqarluni ineriartortitsinermik tunngaveqartariaqarput, innuttaasut akornanni assigiinnerusumik atugassaqartitsisoqarluni.

Anguniakkat tamakku anguneqassappata utoqqaat amerliartuinnarneranni, ilinniagaqartartut ikippallaarnerannik suliffeqanngitsullu amerlavallaarnerannik suliarisariaqakkavut ajugaaffigisariaqarpavut. Iluarsaaqittoqartariaqarpoq tamakkulu pitsaasumik aningaasaqarnermik aallartiffeqassapput.

Taamaammat aallaqqaataanniilli Naalackersuisut pingaartilluinnarsimavaat Namminersorlutik Oqartussat aningaasaqarnerata aqunneqarsinnaanissaa. Tamanna maannakkut ukiuni marlungortuni iluatsippoq. Oqitsuinnaasimannngilaq, amerlaqisullumi aalajangiisariaqarnerit oqimaatsut iluarisarsimannngilaat.

Taamaaliortariaqarsimavugulli, atugarissaarnerpummi meeqqatta akilertariaqalissanngimmassuk. Paarlattuanik uagut meeqqatsinnut aningaasaliisussaavugut. 2011-mi taamaaliornissatsinnut periarfissarissaarsimavugut. Aningaasaqarnerput eqqarsaatigalugu aalisarnermi akigissaartitsisoqarneranik oliasiorlunilu qillerisoqarneranik pissuteqartumik taanna ukioq pitsaasuusimavoq.

Tamatumuuna periarfissaqalerpoq Peqqinnissaqarfimmi utaqqisut ikilisinnissaat immikkut ittumik sulissutigissallugu, taamatullu Aasianni, Ummannami, Tasiilami, Qaqortumi Sisimiunilu ilinniartut atuartullu ineqarfissaannik sanaartornermut 141 mio. koruuninik aningaasaliissalluni.

2011-mut naatsorsuutini takuneqarsinnaavortaaq siumut isigisinnaasimasugut, peqatigitillugulu ulluinnarni ingerlatsinerput aqussinnaasimallutigu.

Tamakkuninnga tunngaveqarlutik Naalackersuisut Nunatta Karsiata Naatsorsuutai Kukkunersiuinermit Ataatsimiititaliamut suliassanngortinneqassasut inassutigaat, ataatsimiititaliamillu oqaloqateqartarnissartik qilanaaralugu.